

四庫全書

史部

欽定四庫全書

唐大詔令集卷六十

宋 宋敏求 編

大臣

將帥

賞功

隴右河西節度使哥舒翰西平郡王制

郭子儀中書令李光弼侍中制

李光弼太尉中書令制

滑州節度使令狐彰加御史大夫制

褒勞勲臣制

李晟司徒兼中書令制

渾瑊侍中制

高崇文劍南西川節度使制

李愬移鎮加官階爵邑制

田弘正兼侍中制

李光顏特進賜一子官制

王智興等加官爵制

王元逵同中書門下平章事制

貶責

薛訥除名為庶人制

賞功

隴右河西節度使哥舒翰西平郡王制

授鉞登壇所以理兵用武益封命職所以褒德酬庸才

傑者建布代之功績茂者有非常之賞哲王令典無或踰之開府儀同三司兼鴻臚卿員外置同正員西平郡王判武部事攝御史大夫持節充隴右河西節度度支營田長行轉運九姓等副大使知節度事赤水軍使上柱國涼國公哥舒翰挺生朔陲干城隴外青蛇入笥神發其祥白武啣珠天資我寶美政以公惠益著深畧以果斷能成頃者戎大已藏禍盈惡稔南援蠻落東窺塞垣特稟廟謀勵八神於金匱長驅戎境麾三軍於玉堂

決水奔雷固無前敵屠城拔壘靡有孑遺收九曲之舊  
疆開千里之沃壤亭障卧鼓既成禁暴之勲屯田饋軍  
益以封財之用則議功行賞厚禮酬勞俾吳芮之忠不  
獨光於漢魏絳之樂無擅美於晉仍蕪望苑之榮繫以  
公田之錫可開府儀同三司太子少保封西平郡王加  
賜實封二百戶通前滿五百戶賜音聲小兒十人莊園  
各一所與一子五品官更與兩子官用旌元帥之勞以  
益三軍之氣也餘並如故

天寶十二年七月

郭子儀中書令李光弼侍中制

朕聞古之哲王成功立極莫不旁求賢佐用康帝道由  
是軒登風力所以戡亂保邦漢用蕭曹所以勤王足國  
固能上扶王室下濟蒼生為社稷之寶臣資帝王之大  
業丕膺鼎位實屬斯人司徒兼尚書右僕射同中書門  
下平章事兼靈州大都府長史朔方節度使上柱國代  
國公子儀道備文武志懷忠亮表弘才而應運申茂績  
而經邦司空兼兵部尚書同中書門下平章事太原尹

河東節度使上柱國薊國公李光弼業盛勳賢材優將  
相蘊權謀而制敵勵誠節以匡時往屬允醜亂常雲雷  
經始咸能外持戎律內翊皇圖披荆棘而有功歷險艱  
而無易或分麾東討掃昏祲於兩都或仗節北臨備長  
城於萬里並以掃清寇孽任切股肱永維締構之勳久  
著山河之誓今殘妖佇剪介士猶虞將終九伐之功實  
藉二南之力是用增其秩序寵以樞衡宜正位於台司  
俾克宣於嘉績子儀為中書令光弼為侍中

乾元元年九月



李光弼太尉中書令制

上公之位寵極人臣中書之本政先綸紘是知應乾成  
象用分台鼎之司為國作楨必藉勲賢之業所以漢庭  
多難絳侯居太尉之尊晉室未安溫嶠掌中書之務至  
若任兼公相道濟生靈必俟非常之才用膺莫大之寄司空  
兼侍中幽州大都督府長史河北節度度支營田經畧  
等使副元帥知諸道節度行營上柱國薊國公光弼器  
格沉正襟靈邃遠感風雲之密契蘊縱橫之大才成經

綸之功足以靖亂懷忠孝之道故能匡國自逆寇搆禍  
寰宇未清義勇竭於忠心勲庸著於王室頃者豺狼餘  
孽尚藉天討蚊蚋相依仍侵河外是用仗其深畧為我  
長城有穰苴之法令亞夫之威畧遠能挫羣凶之銳全  
百勝之師為廟堂之寶臣成軍國之重任雖吉甫作憲  
道可經邦而孫吳行兵謀能制敵克壯大業無愧前賢  
且官惟其人固難虛授爵以存善抑聞舊章况經綸之  
時義參於締構艱難之際功茂於始終不有殊獎寧彰

厥德是以載酬嘉績俾允具瞻宜進上台之秩仍兼右

弼之寵可太尉兼中書令

乾元二年十二月

滑州節度使令狐彰加御史大夫制

使持節滑州諸軍事守滑州刺史攝御史大夫充滑衛  
相魏德博六州節度使令狐彰義勇無倫忠貞有素艱  
危効用終始不渝頃陷賊庭忠誠屢達來持漢節壯志  
彌高拔城變六月之師破敵振三軍之氣酬庸議賞須  
越等夷令淇澳未寧河朔猶梗廓清醜類實屬元戎宜

列職於中司俾承榮於茂秩登壇受律藉爾良謀獻凱  
論功佇聞嘉績可銀青光祿大夫守鴻臚卿使持節滑  
州諸軍事兼滑州刺史御史大夫充滑衛相魏德博等  
六州節度使

上元二年九月

### 褒勞勲臣制

常袞

勅方伯連帥能修其職則勞之璽書載之於正典式是  
羣岳歸於至公以勤其職頌聲興矣周禮以孟春之月  
懸法布令採詩觀俗亦褒異理行之時也其有惠訓一

方吏之表率朗然明舉固可首之某官某受任藩閫三  
年有成清節獨立以身率下化在於言前風行於疆外  
遠清西南之氛齊一華夷之俗而憂國如家上下同體  
屬關輔連雨去秋非穰以豐財節用之餘資備邊出師  
之費雖給馬官渡足食成臯勤王助邊何以加此誠堪  
垣翰之寄奉上無私亦將廉吏清風夙夜相勉也寐期  
休績至于再三詔書諭懷宣示方鎮

李晟司徒兼中書令制

陸贄

勅雲雷構屯寓縣興難非山岳降神不生良弼非股肱  
協契不集大勲故高宗得傳說中興殷邦宣王任吉甫  
重光周道天寶之季寇階二京時則先臣子儀翼戴肅  
宗戡定患難再造區宇於今賴之肆予小子獲纘丕構  
不克負荷失守宗祧天祚我唐降生忠烈有社稷之臣  
曰開府儀同三司檢校尚書左僕射同中書門下平章  
事充神策軍節度使鄜坊等州節度觀察處置等使京  
畿渭南渭北商華等州兵馬副元帥上柱國合川郡王

李晟沉肅有勇堅明能斷聞難發憤誓師徂征誠激於衷義形於色自河之南萬里濟師殷然雷奔大盜懾駭屬王家不造戎師誘姦重茲播遷郊甸震蕩而晟蓄銳養士深壘固軍以謀吞元兇以義糾羣帥躬擐甲冑率先啟行布忠信為軍聲恃禮樂為戰器廓清氛沴寧復皇都宗社載安宇宙斯泰佐予興運時乃茂功德厚者位崇業盛者報重登以元輔建於上公熙庶績而翼宣九歌阜兆人而敬敷五教疇其并賦貽厥子孫與國咸休

永播丕烈可守司徒兼中書令仍賜實封一千戶餘並  
如故朕還京後所司擇日備禮冊命宣示中外以彰大  
勳

渾瑊侍中制

勅王者敦德教以經邦國興武事以定禍亂執是二柄  
毗予一人得諸全才康濟大難以忠扶王室以義奉天  
討功崇祚土德盛懋官振揚洪休備舉盛典開府儀同  
三司檢校尚書左僕射同中書門下平章事兼靈州大



都督府長史充靈鹽銀夏等州節度管內度支營田觀  
察處置押蕃等使朔方邠寧振武奉天永平等軍行營  
節度副元帥上柱國樓煩郡王渾瑊神降才傑天資忠  
厚協力興運為國輔臣往以盜起上京駕急出狩羣凶  
怙亂載犯郊畿時乃奮揚威武董制師律深居籌畫奸  
慝寢謀當敵指揮士旅增氣危城克固我武用張重以  
賊臣茂恩養寇資亂再罹艱阻越播巴梁時乃并轡載  
馳釋羈從邁有見危致命之節有憂國滅私之誠凜然

貞規介若金石縱橫蘊夷難之略感激陳復國之謀分  
摠偏師徑出重險秉大節以示羣帥布寬令以宥脅從  
師次遠郊摧克靡抗軍臨近甸下邑如歸推成功而不  
居期盡敵以自効率其全衆揚旆追奔雄威疾馳元惡  
授首柔德懷服餘黨歸心掃闕氛昏安復陵寢懋乃嘉  
績其惟格天士燮之讓能耿弇之珍寇摠是二美瑛其  
有焉是以銘勲旂常垂美竹帛宜守台階之列仍酬井  
邑之賦祇膺時命無替厥庸可侍中仍賜實封八百戶

無官本使副元帥開府勳封如故

高宗文劍南西川節度使制

慶賞刑威所以為國既用鉞以誅有罪則建侯以報有功懲綱紀於未然勸事君於已著歷考前載斯為大章劍南東川節度副大使知節度事管內度支營田觀察處置靜戎軍等使開府儀同三司檢校兵部尚書使持節梓州諸軍事兼梓州刺史御史大夫上柱國渤海郡王高宗文為時生材經武成器抱厥沉斷確乎堅剛鷲

隼挺凌厲之姿高秋凝肅殺之氣自築壇受命宜社徂  
征形義色以即戎瀝忠誠而誓衆康衢以視其重阻怒  
心如報於私讐令踰風行勢輟電走殄兇邪於未障完  
危壁於將傾然後摠無前之師搏猶鬪之獸仰斷飛鳥  
高橫戰鋒掩鬼神以用竒越丘陵以制勝生致逆豎洞  
開金城引漢將之旗鼓見蜀川之父老貞以紀律弔其  
傷殘兵無亂行市不改肆上清井絡下靜岷江銘而篆  
之豈有慚德乃眷庸部其惟與區畢功以除其禍災圖

勞宜享其土地滌蕩汚俗純綏異行觀風勵韓黃之化  
按節修方召之任爰自六職俾登三司仍疏大封且賜  
實食不踰次以彰殊伐不踰時以示休利敬服嘉命弘  
宣壯猷殿茲坤維屏我王室可檢校司空兼成都尹御  
史大夫充劍南西川節度副大使知節度事管内度支  
營田觀察處置統押近界諸蠻及西山八國兼雲南安  
撫等使仍改封南平郡王食邑三千戶并實封三百戶

李愬移鎮加官階爵邑制

伐叛除兇必侯于奇略進封超位允答於殊庸况四紀  
逋誅三州竊據積妖遺育縱逆延災累年徂征一舉坐  
致論功既歸於異等議賞豈待於踰時唐隨等州節度  
觀察處置等使通議大夫檢校左散騎常侍使持節鄧  
州諸軍事兼鄧州刺史御史大夫賜紫金魚袋李愬宗  
臣之胤王國克生毅勇蓄深溫良煦外禮樂戰之器默  
識其源詩書義之府洞窺其室雖早昇朝序而未展將  
才頃以懸弧滔天宿兵既久方城壓境易帥頗頻永懷

韜畧之家必有弓矢之嗣乃執金鼓載持干旄果副眷  
求克揚威令緝夷傷之後振法為雄制密邇之間保危  
成固推忠孝以感物本信惠而和人一其鬪心制彼死  
力乘虛徑襲負雪兼行風驅如合於百人雷震若出於  
九地堅城立潰狡豎生擒遺氓安堵以知歸餘黨釋甲  
而請命古之良將其孰過焉已申獻捷之儀當舉策勲  
之典爰授名郡俾牧重藩自洛而遙惟襄為大綿亘楚  
服橫臨漁津摠八郡以澄清秉三軍之節制式因加地

往繼沉碑特進左揆之尊以宗天秩仍假南臺之長用  
峻霜威表以勲階錫之茅土戶封真實門貴延恩給此  
寵榮聚於茂烈於戲天鑒非昧不庭者必誅王爵無私  
有功者是享揚名繼美惟孝著於家聲鐘鼎山河惟忠  
光於國籍凡曰臣子得無企歟可銀青光祿大夫檢校  
尚書左僕射使持節襄州諸軍事守襄州刺史御史大  
夫充山東南道節度管內度支營田襄鄧唐隨復郢均  
房等州觀察處置等使仍賜上柱國封涼國公食邑三



千戶賜實封三百戶與一子正員五品官

元和

田弘正兼侍中制

古之所謂有功諸侯出征不庭入覲王室既展述職之義必加錫命之恩彤弓所以表其威玄衮所以榮其服然後勲烈昭灼寵章榮崇臨於一方示彼四國風雅所載不其美歟戎思忠臣是有茲命魏博等州節度觀察處置等使光祿大夫檢校司徒同中書門下平章事兼魏州大都督府長史上柱國沂國公食邑三千戶田弘

正受天地之正性明君臣之大節才貫文武識探古今  
熙百志以立身堅一心而奉主積誠自久遇事乃彰曉  
於羣情率以大順遂提六郡之地首草兩河之風及負  
海阻兵徵師問罪又能長驅義旅直抵虜城一鼓而克  
徒褫魄再戰而元惡傳首永清夙功實倬然自秉圭  
來朝鳴玉入侍察其器度詢以謀猷每聞匡國之術彌  
見致君之道而懇誠戀闕不願守藩朕以將相之權中  
外一體苟意有攸往則誠難遽從况彼邦之人皆願其

至師徒久服其訓令黎庶咸思其惠和鎮安之方倚賴  
攸切是用命爾式遄其歸且兼八舍之營俾仍五教之  
重又實其并賦益以土田褒賞之典勸忠斯在往蒞乃  
服厥惟懋哉可檢校司徒兼侍中依前魏州大都督府  
長史充魏博等州節度觀察處置等使仍賜食實封三

百戶

元和

李光顏特進賜一子官制

朕聞有天下者道德仁義以為理城郭濠池以為固故

曰不教民戰是謂棄之有備無患何以應卒此先王毆攘夷狄保障黎元之大略也五原居宥夏靈慶之中當虵豕豺狼之突將搯咽喉之要爰命腹心之臣厥有成功宜加茂典邠寧慶等州節度觀察處置等使金紫光祿大夫檢校司空使持節邠州諸軍事邠州刺史兼御史大夫上柱國武威郡開國侯食邑二千戶食實封一百戶李光顏氣敵三軍心師百行有下莊之勇守之以仁有日磬之誠濟之以武叱咤則風雲迴合進晏而

樽俎周旋蓋文武之全才直古今之良將是以淮蔡之  
役百勝功高青齊之師一面居最朕以蕭關尚警馬嶺  
猶虞五餌之詐可羞百雉之防爰度先是屬役每難其  
人惟爾良能果諧予願程功而不愆於素訖事而不勞  
於人比命有司褒乃實力僉曰古諸侯勲德優盛則就  
加特進以寵之我國家封植崇重則朝請一子以異之  
予嘉乃勲兼用兩者茲謂上賞爾惟欽哉可特進餘如  
故仍與一子正員四品常參官

元和

王智興等加官爵制

王者誅暴亂賞勲勞既正紀綱式頒爵位朕以菲德理  
乖勝殘使覺生海盜刑用戎鉞屬者庭湊倚滄州為輔  
車以謀專土同捷恃棣州為屏扞遂成阻命實賴英帥  
共恢壯猷爰議酬庸式獎宣力武寧軍節度徐泗濠等  
州觀察處置等使充滄州行營招撫使光祿大夫守司  
徒同中書門下平章事上柱國太原郡開國公食邑二  
千戶王智興可特進仍封代國公食邑三千戶餘如故

平盧軍節度使淄青登萊棣等州觀察處置兼押新羅  
渤海兩蕃等使銀青光祿大夫檢校尚書右僕射御史  
大夫上柱國會稽郡開國公食邑一千五百戶康志睦  
可檢校尚書左僕射餘如故太平軍節度鄆曹諸軍事  
兼鄆州刺史御史大夫賜紫金魚袋崔弘禮可檢校尚  
書右僕射餘如故其棣州城下武寧軍及諸道立功將  
士除已甄錄外委智興條疏聞奏棣州應見在百姓宜  
復二年其將士有決戰攻壘奮不顧身中刃被創遂成

廢疾者並賜衣糧終身勿絕其武寧軍及平盧軍浙西  
宣歙天平等五處兵馬在棣州城下者並宜放歸本道  
於戲並命申威分疆剪寇界大河之南北委藩守以廓  
清立績者既以勞旋圖功者方期盡敵勉弘朕策無至

老師共輶輯寧副我勤厲

元和二年十一月

王元逵同中書門下平章事制 李德裕

門下古之命帥必重其名假三事之崇允萬夫之望故  
韓信以丞相擊魏樊噲以相國伐燕克成茂勳抑有前



典成德軍節度鎮冀深趙等州觀察處置兼充北面招  
討澤潞等使金紫光祿大夫檢校司徒兼鎮州大都督  
府長史御史大夫駙馬都尉雲騎尉王元逵生稟忠厚  
天資誠信竒正得於心機嚴莊表於師律去病之略無  
假孫吳翁歸之才實備文武屬校童逆命自固奴巢果  
能揚義聲以載馳繇直道而先奮鋒逾駭電勢盛疾雷  
上據層巒削成煙壘下臨平壤盡見秋毫始殄伏莽之  
戎遽收建瓴之險陳兵原野漸扼堯山摧困獸之鬪心碎螳螂

之怒臂棄身者萬計折首者七人先獻戎俘益彰臣節  
則令望王師之陣草木為兵聞吾帥之風椒蘭比德顧  
其殘孽豈復稽誅夫賞不踰時速之為貴雖契敷五教已  
列三公而禹分兵虜宜佩相印是用命爾升於鼎司於  
戲昔吳起有大功者三不為魏相竇嬰破藩國者七未  
踐漢台豈非名器之重曷嘗虛授爾其奮揚威武殲厥  
渠魁當感激以成功勿遷延而玩寇服茲休命可不敬  
哉可檢校司徒同中書門下平章事兼鎮州大都督府

長史依前充成德軍節度鎮冀深趙等州觀察處置兼  
充北面招討澤潞等使散官駙馬勳如故主者施行會昌

貶責

薛訥除名為庶人制

出師不臧本於喪律責帥歸罪聞於記言薛訥頃者總  
戎禦邊建議為首暗於料敵輕於接戰張我王師歟之  
寇境偏裨失節乃斯令之不明中軍靡旗則厥謀之不  
振况雁門斬級魏尚豈得論功馬邑亡韜王恢必聞議

罪進退之咎典刑攸屬且觀其疇昔頗嘗輸罄每欲資  
忠報主見義忘身儻曹沫不死於辱終能自奮秦赦孟  
明之敗漢從李廣之贖古嘗有矣朕每懷之特緩嚴科  
俾期後效宜放其罪所有官爵並除削

開元二年七月

唐大詔令集卷六十

欽定四庫全書

唐大詔令集卷六十一

宋 宋敏求 編

大臣

尊禮大臣

魏公寂已下奏事侍立並升殿詔

郭子儀號尚父制

杜祐每月三兩度入朝商議軍國大事制

裴度平章軍國重事三五日一入中書制

異姓王

封五王制

冊張柬之漢陽郡王文

冊崔玄瑋博陵郡王文

封魏伯玉陽成郡王制

封辛果京晉昌郡王制

封王景崇常山郡王制

異姓妃

冊崔玄瑋妻為博陵郡王妃

冊三公

冊無忌司空文

冊郭子儀尚父文

冊李晟司徒文

冊李晟太尉文

冊馬燧司徒文



冊裴度司空文

冊李德裕太尉文

殘

冊杜讓能太尉文

闕

尊禮大臣

魏公寂已下奏事侍立並升殿詔

貴爵尚齒歷代通規進秩優賢有國彝訓尚書左僕射  
魏國公寂太子少保新昌縣公網左武侯大將軍陳公  
抗太常卿沛國公元壽納言漢東郡公叔達內史令宋

國公瑀兵部尚書蔣國公通民部尚書滎陽郡公善果右  
武侯大將軍羅侯御史大夫滑國公無逸等或歷任前  
代職位隆顯或者年夙望德邁老成翊戴經綸功績茂  
重或夷險契濶情兼惟舊並職司近侍任兼心膂恩禮  
所加義從隆渥特宜褒異俾越常倫寂已下奏事及侍

立並令升殿

武德二年二月

郭子儀號尚父制

軒皇致治必資力牧虞舜為政實賴臯陶苟無師臣豈

登仁壽故呂望輔已成之業指揮致維師之名伊尹出  
空桑之中翼贊負阿衡之號司徒兼中書令河中尹靈  
州大都督單于鎮北大都護充關內河東副元帥朔方  
節度關內度支鹽池陸地水運大使押諸蕃部落兼管  
勾河陽道觀察等使上柱國汾陽郡王山陵使食實封  
一千九百戶子儀氣膺台輔道佐經綸當乾坤交泰之  
時正君臣定位之禮我肅宗皇帝龍飛靈武剪滅鯨鯢  
公則揚旆宣威佐清六合我大行皇帝撫軍鞏洛收復

都邑公則摧殄克寇滌穢兩河而又獫狁犬戎共侵經  
略公則挺身鋒刃獨立戰場叱退窮醜威維七萃塞垣  
無警社稷永康朕遭閔凶爰在諒闇公又外殫百揆內  
舉四維委監山陵克修制度萬樞倚辦庶績其凝凡所  
詢謀必竭寅亮敬加典禮則率土歡心寄以緝熙則彝  
倫式序弘宣五教訓洽生靈光照七德威肅禍亂豈周  
武有尊師之道朕無崇德之名宵衣永歎夕惕增懷雖  
年者益明轅門待鎮然後上寄重留藉毗倚可加號尚

父兼太尉中書令山陵使勳封如故仍加實封通前滿  
二千戶每月給一千五百人糧料並給二百疋馬草料  
有司備禮以時而冊命

杜佑每月兩三度入朝商議軍國大事制

卿量包久大器茂冲和事君推一德之誠與物全四時  
之信登于臺閣則萬事問於胡公守在方隅則四方宗  
於申伯舉其實行是可專徽頌者殷憂在辰總敘攸重  
金甌作鎮羣情穆然玉鉉是司庶官咸事朕涉理猶淺

惟賢是圖遽陳請老之章將輟弼諧之道一一省覽良  
用憮然用舍之間慎重斯在謂雅節之難奪豈予衷之  
可移是用徵上德之前經酌優賢之故實去繁就簡勉  
以職業之勤置几乘車優且筋力之禮卿宜起今已後  
每月之內常三兩度入朝使至中書商量國事亦異延  
於內殿沃朕虛心如此則居多暇辰退可以吐納頤志  
入參大政進可養息藩君靈壽將置於上庠桑梓豈違  
於下社卿仍以朕此意宣示百寮庶予君臣作合之期

乾坤交泰之儀無愧前烈永貽後昆致政之詞即宜斷  
表

裴度平章軍國重事二五日一入中書制

昔漢以孔光降置傳之詔晉以鄭冲申奉冊之命雖優  
隆者德顯重元臣而異政不及於咨詢用禮獨在於安  
逆朕繫至理所寶惟賢顧誕舊勞敢不加敬由是委宰  
執於大政釋參決於煩務時因聽誠望弼諧遷秩上  
公式是殊寵特進守司徒兼門下侍郎同中書門下平

章事充集英殿大學士上柱國晉國公食邑三千戶食  
實封三百戶裴度稟河岳之英靈受乾坤之間氣珪璋  
特達城府洞開外茂九功內包一德器為社稷之鎮才  
為邦國之楨故能祇事累朝宣融景化在憲宗時掃滌  
區宇爾則有出車殄寇之勲在穆宗時混同文軌爾則  
有參戎入輔之績在敬宗時阜康兆庶爾則有治國庇  
人之勲洎弼朕躬總齊方夏爾則有弔伐底寧之功皆  
不遺廟筭布在簡編功利及人固不可悉數而朝論益



重我心實知方用咎繇之謨適值留侯之疾瀝懇牢請  
備列奏章塞詔上言動形顏色果聞勿藥之喜更候調  
鼎之功而體力未和音容尚阻不有優崇之命孰彰寵  
待之恩宜其首贊樞機弘敷教典論道而儀型卿士宣  
德而鎮撫華夷嗇養精神保綏福履為國元老毗予一  
人可司徒平章軍國重事待疾損日每三日五日一度  
入朝中書散官勲封如故仍令所司擇日備禮冊命

異姓王

封五王制

門下建侯之典豈獨於懿親茅土之榮必覃於茂績侍  
中上柱國開國公敬暉侍中上柱國譙郡開國公桓彥  
範銀青光祿大夫守中書令兼修國史上柱國漢陽郡  
開國公張柬之銀青光祿大夫中書令博陵郡開國公  
崔玄暉中書令兼檢校安國相王府長史上柱國南陽  
郡開國公袁恕己等早竭忠謹夙罄腹心在身喻於股  
肱在物均於舟楫除兇而殄逆更安社稷之基榮命而

褒崇爰申建侯之寵敬暉可封為平陽郡王彥範可封  
為扶陽郡王仍賜姓韋東之可封為漢陽郡王兼特進  
勳及食實封各如故玄暉可封為博陵郡王恕已可封  
為南陽郡王仍令准例墾朝參便即不須推讓主者施

行神龍元年  
五月十日

冊張柬之漢陽郡王文

維神龍元年歲次乙巳五月關

朔十五日關

皇帝

若曰咨古者之命官也有德尊以爵有功尊以祿用能

百揆時敘庶績其凝詳其建利之跡也異姓則鬻熊封  
之於楚宗子則召奭宅之於燕惟皇作極率由前典咨  
爾銀青光祿大夫中書令監修國史漢陽郡公張柬之  
効祉星辰資靈川岳負佐時之畧有經邦之材以忠孝  
為己任以仁義為事業頃者巨猾未殄常思克清一朝  
奮臂二兇行翦竟燃臍於東市終掛膽於西州遂得聖  
祚中興皇運光啟乾坤再闢日月重明刑白馬而書功  
未足云容指青山之比礪曾何足酌是用命爾為特進

漢陽郡王爾其靖恭乃職咸允具瞻使厚秩尊官水全  
於長代春蘭秋菊無絕於終香往欽哉可不勉歟可不  
慎歟

冊崔玄暉博陵郡王文

維神龍元年歲次乙巳六月乙酉朔六日甲寅皇帝若  
曰咨德茂之官功茂之賞萬古常行之則千載不刊之  
典故三十一之啓漢二十一之中興或舉霸如拾遺或  
取秦隴猶偃草結丹青之誓蒞白馬之盟祚土已茅與

洪河而永固分珪錫社共天壤以長隆緬考舊章率由  
此道爾中書令上柱國博陵郡公崔玄暉夙負雄圖早  
懷英毅蘊公輔之量有王佐之才頃者元兇構姦圖危  
社稷遂能懷忠抱義奮不顧身重道輕名意全王室艱  
難既濟家國永清勤亦至矣功亦大矣昔賞及於鸞熊  
聿封於楚功尊於臧綰乃建於燕異姓分王抑惟前典  
憲章故事疇庶載功是用命爾為博陵郡王用旌誠効  
宣其忠節松竹無渝往欽哉汝諧可不慎歟

封魏伯玉陽成郡王制

門下建爾茅社所以親諸侯加以金紫所以封異姓蓋  
章敘之舊制必選功而茂賞開府儀同三司檢校工部  
尚書兼江陵尹御史大夫充荆南節度觀察處置等使  
上柱國芮國公魏伯玉性與弘毅識資冲遠公直不撓  
智謀尤深忠厚可移文武是憲幼讀墳典素已知名於  
國庠晚藉韜鈴因効策於戎幕累膺將帥之重積有艱  
鉅之勲殫力事邊乃誠王室伏波料敵每合我心司馬

理軍差強人意自荆門作鎮式是南邦九江孔殷三楚  
之會澄清節制實得專征而講求政理開示恩信既愛  
人而省刑將息馬以論道寬而有制令協於師貞簡則  
易從風行於刺舉疆事寧宴厥功茂焉二等之榮允茲  
馭貴宜錫褒封之命俾光優異之禮可封陽城郡王食  
邑三千戶餘並如故

封辛果京晉昌郡王制

門下關內河東副元帥左廂兵馬使同朔方節度副使



開府儀同三司試太常卿兼御史中丞上柱國蕭國公  
果京文武成器公忠立節副旌麾於戎府戒士馬於轅  
門縱橫有謀沉毅多勇守能重固戰必先登弘變通以  
以制用崇取勝之嘉績勤王憂國歷險不渝奉職在公  
始終無替封建之制率由舊章以功詔爵議賞從重宜  
分茅於二等俾有國於千乘可封晉昌郡王食邑三千  
戶

冊王景崇常山郡王文

維乾符五年歲次戊戌十二月壬戌朔三日甲子皇帝  
若曰朕聞尚德尊賢九命有專征之典論功錫爵四封  
標列國之榮暎惟碩臣統茲巨屏茂勲克樹殊寵未升  
爰增䟽土之恩式表類能之重成德軍節度使鎮冀深  
趙等州觀察處置等使開府儀同三司檢校太尉兼中  
書令鎮州大都督府長史上柱國趙國公食邑三千戶  
食實封二百戶襲實封一百戶王景崇德星垂耀嵩嶽  
降神抱匡君濟俗之宏才蘊武庫文房之重器智逾災

輟利比決雲運協祥符懷茂先之博識道高時傑同李  
野之陽春臨戎克布其恩威命代榮彰乎經濟惟乃祖  
禰名光簡書正氣冲霄忠誠貫日永言勲績著美華夷  
承家得馭衆之方共理契無為之化成吾心膺藉乃棟  
梁加以政治兵農惠分黎庶俾羆貅之衆敬若神明襁  
褓之徒愛如父母况位升台鼎績著翰垣華賢復異於  
陳蕃顯秩尤光於朱寵更舉封齊之典冀同繼越之尊  
於戲啟金滕於周公剪桐圭於康叔皆昭彰前史蔚著

殊庸况今榮耀八紘富居千乘式茲優異尚此渥恩往  
惟欽哉敬服厥命今遣使給事中柳韜副使吏部郎中  
趙祕持節冊爾為常山郡王

異姓王妃

冊崔玄暉妻為博陵郡王妃文

維神龍元年歲次己巳六月乙酉朔六日庚寅皇帝若  
曰咨夫母以子貴妻以夫榮聞諸通古列在方策惟爾  
博陵郡王崔玄暉妻盧氏策推福胤歸乃慶餘備嫺詩

禮夙擅言辭斷織捐金通母師之雅訓採蘋銘菊遵女  
史之明規向時王室艱難逆臣構禍敬暉等忘家徇國  
剪暴誅凶二曜重朗萬姓相歡爰命酬庸聿予茂賞大  
名隆器已錫於所天徽號寵章宜覃於齊體今遣銀青  
光祿大夫行尚書右丞上柱國蘇瓌副使通議大夫守  
太常少卿韋叔夏持節賫冊於是命爾為博陵郡王妃  
爾其無違藩守務於和理而使家可長久聖人重之可  
不美歟敬之哉

冊三公

冊齊國公無忌為司空文

維貞觀某年月日甲子皇帝若曰於戲開府儀同三司  
齊國公無忌設官分職允代天工致治興邦實資台輔  
永覽前哲咸在得人故能成寅亮之功弘燮理之業惟  
爾識宇冲邈風範光昭才稱棟幹器惟瑚璉協贊皇基  
克隆鼎業譬彼舟楫同茲魚水任重禮闈則機衡以穆  
位班職袞則風雨不愆固以同軌前烈齊聲往彥褒德

欽定四庫全書

唐大詔令集  
卷六十一

十三

美功有國常典經邦論道僉曰爾諧是用命爾為司空  
往欽哉其光膺寵命可不慎歟

冊郭子儀尚父文

維大歷十有四年五月甲午皇帝使金紫光祿大夫尚  
書左僕射彭城郡開國公攝太尉劉某持節冊命曰惟  
爾太尉兼中書令汾陽郡王某其聽命於戲上天孚佑  
下民若保赤子弗俾罹於毒螫伊昔殷辛秦季萬姓愁  
苦時則有太公望留侯良毗武翼高為之請命若顛覆

而躋執熱斯濯其在天寶至德之際二叛稱兵犬戎孔  
亟則公投袂電赴捍我於艱方其憂亂化為安靖然後  
變和徐進清廣安和繫公之勲蓋於張呂矣憫予小子  
哀斃在疚公又熙帝之采納於軌度小大謀猷罔不率  
服朕實賴公羽翼為師為保豈齷齪常典擬於春秋之  
褒今故特冊公尚父之號欽哉公左右三朝年與德耆  
尚迪古訓匡予不及節順風雨參知鼎實天人之任將  
以仰成公其念哉惟公克享黃髮優游廣堂頤神導和



克綏予任勗哉尚父敬聽話言用成其明德欽哉光膺  
寵命可不慎歟

冊李晟司徒文

維年月日甲子皇帝若曰粵惟上天眷佑我唐賚予元  
輔戡夷逆亂宣振忠貞光昭永圖奮揚丕烈今敬從典  
禮彰信於朝咨爾開府儀同三司檢校尚書左僕射同  
中書門下平章事合川郡王李晟希代特生乘時間出  
高明稟忠厚之楨故得擁是旄幢徇於封畧旋師中冀

討孽上京一鼓而克魁電竄皇居乃正清廣重安大效  
展於邦家大惠孚於黎庶武昭七德文洽九歌俾予一  
人潛復丕業抑聞功茂茂賞義在酬庸德茂茂官理在  
翊善爾既憂勤戮力端明一心中之以武功重之以文  
德是用稽之舊制冊命爾為司徒宜亮采台庭光融相  
府敘彝倫於九牧凝庶績於百工祇率典章阜成邦教  
膺茲景命可不慎與

冊李晟太尉文

維貞元元年歲次丁卯四月乙卯朔二十四日戊寅皇  
帝若曰在天成象三辰耀其景在地成形五嶽峻其位  
古先哲后罔不憲章故則天之明因地之利建官自輔  
論道經邦配六符於太階運七政於皇極無其才則禮  
闕有其德則榮升爰自唐虞率由斯道故久虛上台之  
坐以俟其人載懷勲賢聿歸元老咨爾奉天定難功臣  
司徒兼中書令上柱國西平郡王食實封一千五百戶  
李晟天授明德為時棟梁應期挺生佐理戡難作我英

宰保大定功渾忠義以居心等夷險以為體魏郊伐叛  
申肅殺之威漢苑摧兇樹廓清之效宮城遂復廟社攸  
安三輔釋塗炭之憂萬國允朝宗之願及夫藩鎮政下  
黎獻昭蘇綽稜威於接境阜農耕於裔壤欽若朝政索  
戢干戈弼予一人永清四裔聿懷丕茂之績式宗光大  
之勲是用命爾為太尉惟其敬之哉且德盛故禮殊功  
高故賞茂爵極九命華貫三台持華歆養德之規保荀  
覲清純之道具瞻斯在可不慎之

冊馬燧司徒文

維年月日甲子皇帝若曰昔有虞之帝天下也契作司徒誕敷邦教五常以遜百姓斯親其在鄭友翊亮於周鄧禹宣猷於漢亦皆以德當國以勲持令天贊我唐允生忠輔出則擁旄定亂重其望以成功入則調鼎登庸資其實而論道再新茲典榮命攸宜咨爾檢校司徒兼侍中北平郡王馬燧岐山粹靈楨我王國明謀炳於著蔡雄略極乎韜鈴文武在躬剛柔備體欽崇一德期協

阿衡故能受命專征作我心膂揚旌仗鉞外鎮雄都正  
師律以寧邊宣國風而撫俗華夷式叙朔塞無虞崇其  
大勲謙德彌著懿茲茂範實簡予衷昔貞觀初戡定羣  
雄拯寧庶類有若趙國公無忌外運夷凶之功內申翼  
善之謀陟居中台鬱為時棟今予亦命爾光贊大猷是  
用冊爾為正司徒宜祗厥位九功不敘咨爾緝熙五品  
不昭咨爾寅亮予違汝弼無或面從式宣勵翼之誠允  
副寵光之命具瞻斯在可不慎歟

冊裴度司空文

維年月日甲子皇帝若曰三台羅列以承斗極皇王取  
象以建三公時以調陰陽又萬國論道興化與天地參  
故職官物采不足以昭章物數於是有明庭冊拜清廟  
謁見之禮以尊異之咨爾金紫光祿大夫守中書侍郎  
同中書門下平章事兼淮南節度副大使知節度事晉  
國公裴度有文理有武功有直聲有忠節弘深如大浸  
峭拔如喬岳愛人如慈母宰物如權衡師儒術於素王

授兵符於黃石百行九德疊於其躬先皇以上聖之資  
啓中興之運咸有一德時惟汝諧白雲唱呂受翁施弘  
翊助神筭底綏四方大旆東搖淮夷蕩定長策獨運全  
齊以平解紛消慝無小無大去權樹善或顯或晦非可  
以造次詳非可以一二計肆予小子昔當守器休功令  
問充溢聽聞逮此纘承委重藩鎮達經國之大體有事  
君之小心知無不為功多不伐可謂社稷之元老經濟  
之宏材者也予嘉乃勲懿乃德庸建爾於上公爾惟省



厥初念厥終任天下之安危為夷夏之表式俾先帝之  
鴻業休德不墜於地俾予一人實受其福於戲敬哉

冊李德裕太尉文

皇帝若曰惟天育生物必極其毒而後臻於和惟君保  
天祿必登厥德而後底於道我國家達皇圖焯鴻業二  
百三十祀祖宗儲休俾予嗣厥位祇若天地紹古之訓  
惟賢時念乃有家臣光祿大夫守司徒兼門下侍郎同  
中書門下平章事充弘文館大學士太清宮使衛國公

李德裕佐予一人撫四夷親萬國文以和政武以寧亂  
嗚呼爾有蹈義却金之操不渝於險易爾有移忠匪石  
之志可薦於宗社故剪吾欲以康務沃朕心而成德日  
者孤星耀芒朔漢之人若墜沸鼎惟爾總合智力撲其  
氛焰盜萌蠹本牙角滅息孽豎扇禍構釁閉險聯鋒趙  
魏淮潞五州之人是莫不有其生於旦夕惟爾協予一  
人經是七德決自樽俎發如雷電風后之握機成陣密  
比軒皇羊祜之沉謀制勝玄同晉帝修德刑為戰器閱

禮樂為身文雖其功不

以下原闕

唐大詔令集卷六十一

欽定四庫全書

唐大詔令集卷六十二

宋 宋敏求 編

大臣

冊國公

冊高士廉改封申國公文

冊李勣改封英國公文

冊程知節改封盧國公文

冊侯君集改封陳國公文

冊段志玄改封褒國公文

冊羣臣

冊張允恭鄴州都督文

冊唐臨吏部尚書文

冊段寶玄越州都督文

冊喬師望涼州刺史文

冊閻立本工部尚書文

冊李寬太子詹事文

冊李義府司列太常伯文

冊劉伯英左監門衛大將軍文

冊竇元德司元太常伯文

冊許圜師左相文

冊薛孤吳仁右金吾衛大將軍文

冊許敬宗太子太師文

冊張延師左衛大將軍文

冊國公

冊高士廉改封申國公文

維貞觀某年月日甲子皇帝若曰於戲昔周建五等漢班六條經邦之制既弘載祀之祚惟永是以樊侯申伯功成藩翰喬卿叔節績宣制舉惟爾特進吏部尚書許國公高士廉識字弘正風鑑秀澈地惟姻戚才稱棟幹雲雷在三運霸圖於艱難龜鼎有歸奉王猷於獻替廊廟推重縉紳佇德總方牧之寄勝殘播美綜銓衡之職

得人流詠固以聲高多士功書太常桐柏作鎮長淮設  
險形勝之地允屬勲賢是用命爾為使持節申州諸軍  
事申州刺史改封申國公傳之子孫世為唐輔往欽哉  
率循典禮勉固誠節垂裕來葉以保黎庶可不慎歟

冊李勣改封英國公文

維貞觀某年月日甲子皇帝使某官持節冊命曰於戲  
列爵者必俟茂勲設官者咸資懿德所以翼贊王室弘  
宣帝載惟爾光祿大夫行并州大都督府長史太子左



衛率曹國公李勣識量恢弘風略弘遠忠以奉上信以  
立身獻款西歸邙鄜風美分麾東略號鄭景從預艱難  
於藩邸展經綸而方面南定維揚北清大漠威振殊俗  
勳書丹府及入司禁旅出帥藩鎮勞動表於夙夜績用  
成於期月斬黃之地濱帶江淮鎮捍之重允屬功烈是  
用命爾為使持節新州諸軍事新州刺史改封英國公  
任重六條地優五等為朕藩屏傳爾子孫往欽哉其祇  
膺朝命克固臣節勤恤黎元垂裕後世可不慎歟

冊程知節改封盧國公文

維貞觀某年月日甲子皇帝使某官某副使某官某持  
節冊命曰於戲蓋宣條作牧祚土建侯共治長寄藩翰  
斯在惟爾左領軍大將軍檢校都督宿國公程知節志  
懷銳穎氣幹強果業預艱難効宣行陣入帥禁衛勤誠  
著於軒陛出鎮方隅惠化洽於黎俗酬庸有典式隆寵  
命是用命爾為使持節朗州諸軍事朗州刺史改封盧  
國公傳之子孫長是藩屏往欽哉爾其戒典謨之訓固

臣子之節勤修政道以貽爾後可不慎歟

冊侯君集改封陳國公文

維貞觀某年月日甲子皇帝若曰於戲夫經邦之道必資長策利建之義式固無窮是以周之列國祚世藩屏漢之功臣永垂帶礪惟爾兵部尚書潞國公侯君集體業貞固識量恢凱任切腹心寄深文武草昧惟始奉一匡於藩朝光華在運典九伐於禮樂入陪禁中出臨闔外贊嘉謀於樽俎掃逋寇於遐荒誠量歲寒勲勒庸器

宛丘之地實惟舊鎮胙土作牧允屬朝望是用命爾為  
使持節陳州諸軍事陳州刺史改封陳國公傳之子孫  
世為唐輔往欽哉爾其克固臣節思勗王度夙夜匪懈  
無替典則可不慎歟

冊段志玄改封褒國公文

維貞觀某年月日甲子皇帝若曰於戲夫計功裂土量  
能分職所以光贊王室康又黎元惟爾左驍衛大將軍  
樊國公段志玄理懷沉毅氣幹強雄蜀漢委質早効忠

欵潁州從戎備盡心力預艱難於藩朝陪戎征於閩外  
勤宣階陞功表旌旗方城之地襟帶巴蜀藩翰之重實  
俟勲庸是用命爾為使持節荊州諸軍事荊州刺史改  
封褒國公傳之子孫世為藩輔往欽哉爾其勉固一心  
勗茲六行克勤政術無替彝典可不慎之乎

冊羣臣

冊張允恭鄆州都督文

維顯慶元年歲次丙辰十二月辛卯朔八日戊戌皇帝

若曰夫安邊訓俗有國之先務簡賢任能為政之常典  
惟爾蘭州都督安陸縣開國公張允恭器宇詳整識用  
通遠夙著勤誠早延恩遇朔方違覓羌戎薦居降節監  
撫綏懷攸屬是用命爾為使持節都督鄯蘭河儒廓深  
濠七州諸軍事鄯州刺史封如故爾其鎮靜幽荒式清  
姦宄愓威稜以肅遠明賞罰以垂信無怠庶政率由舊  
章光膺寵命可不慎歟

冊唐臨吏部尚書文

維顯慶二年歲次丁巳十月丁亥朔十九日乙巳皇帝  
若曰昔虞舜分司元凱膺機揆之任當塗受命盧毓處銓  
綜之重故能翊宣景化協贊時雍惟爾度支尚書唐臨  
器識沉敏恭履貞潔譽滿同行效彰官次損益機務爰  
著循聲藻鑑流品是資清識是用命爾為吏部尚書爾  
其懸衡處物虚心待士求賢審官循名責實祇承朝寵  
可不慎歟

冊段寶玄越州都督文

維顯慶三年歲次戊午七月辛巳朔十九日己亥皇帝  
若曰於戲夫成俗康邦寄深於岳牧宣風闡化任重於  
循良惟爾銀青光祿大夫行洛州長史段寶玄體量凝  
整理懷貞瞻總務仙臺能官著於紀綱分司棘署令德  
表於平戾三川之野允敷聲績九江之地爰資鎮撫是  
用命爾為使持節都督越台括婺泉建六州諸軍事越  
州刺史爾其勤加恤隱勉思為政審之以刑獄馭之以  
公平革剽悍之風歸淳質之軌欽茲寵命可不慎與



冊喬師望涼州刺史文

維顯慶三年歲次戊午十月庚辰朔十一日庚寅皇帝  
若曰於戲夫恤隱求瘼義重於循良撫衆懷邊允資於  
才幹惟爾正議大夫涼州都督駙馬都尉喬師望風情  
敏濟志略明遠夙承寵榮早預驅馳仗節秋方功勤克  
展分符朔野政利伊肅玉門遠控金城遐阻人兼北狄  
地雜西戎刺舉為難式遏斯重是用命爾為使持節八  
州諸軍事涼州刺史駙馬都尉如故往欽哉祗膺典冊

勉修爾令德思効爾忠規垂清白之風布平廣之化絕  
姦宄於亭障徵訟獄於閭里嗣其和氣之美草彼貧婪  
之化光我王度可不慎與

冊閭立本工部尚書文

維顯慶四年歲次己未三月戊寅朔十七日甲午皇帝  
若曰職管納官任專機事上非德而不受下非才而不  
處咨爾將作大匠上護軍閭立本識局周敏理懷通悟  
體忠勤而表性資仁恕以立身而思協多能藝兼衆美

委質運始策名朝列知効光於果職聲猷布於歷紀爰  
緝水土之官實諧縉紳之論是用命爾為兼工部尚書  
勲官如故往欽哉其敬承休命獻善之規攸屬持平之  
務斯在克恭惟允可不慎與

冊李寬太子詹事文

維顯慶四年歲次己未三月戊寅朔二十五日壬寅皇  
帝若曰於戲弼諧儲副必俟才英總務宮端允資忠量  
故漢朝選德受禮峻於寶卿晉代遴賢升榮歸於謝琰

咨爾金紫光祿大夫懷州刺史上原縣開國侯李寬識  
局沉謹理懷詳正勤誠表於內外智効張於文武聲猷  
載闡蓋秩兼優博望斷裁之規與能僉屬承華彈肅之  
寄任賢在斯是用命爾為太子詹事封如故往欽哉其  
祗膺茂典勉修乃職景前哲之高踪垂後昆之令譽對  
揚休寵可不慎與

冊李義府司列太常伯文

上官儀

皇帝若曰於戲山祗誕况協申甫於昌期河靈屬符埒

蕭張於景運故乃訐謨帝載歲筴鼎業宣猷華於樽俎  
燮政藻於丹青望重九霄道光五政咨爾兼吏部李義  
府遠資門德獨秀人靈照赤野而合輝映青田而寫韻  
孝睦為本錫類之範彌彰清白為基畏知之迹愈劬金  
羸仞彩辨終豹於書林珠握分光騁鄒龍於筆海柏臺  
擣公晏之藻蓬閣開良直之謨勝望挺於何車竒謀表  
於韓劍藝倫寄其元穆品鏡任其清通矯翮培風拂雲  
霓而高邁聳鱗遊霧排閭闔而上馳行乎明親聲流簪組

是用命爾為司徒太常伯勳封如故同東西臺三品往  
欽哉爾其卑以待物持盈之理斯存慎以節躬數服之  
情為重道申規獻義先啟沃祗膺茂躅可不慎與

龍朔二年

二月  
五日

冊劉伯英左監門衛大將軍文

皇帝若曰閭闔任隆周廬禁切既忠賢之允著實韜略  
之兼優惟爾冠軍大將軍行左驍衛將軍山陽郡開國  
公劉伯英志力沉濟襟情爽烈早標竒正之術彌光巡

警之功偃沙巨海

闕

功宣六豹氣壓

三韓折衝之效有聞爪牙之任攸屬式疇徽烈擢衛宸  
闡是用命爾為左監門衛大將軍封如故往欽哉爾其  
職司無荒朕命不虞之寄可不慎與

龍朔二年

冊竇元德司元太常伯文

上官儀

皇帝若曰於戲總務文昌司會之名尤重升榮建禮內  
史之職彌隆自非才氣兼洽聲譽充盛何自式管榮辱  
對揚綸綍惟爾大司憲護軍竇玄德門列克章地華合

緒踐中和而立性資又德以含章禮固騰芳儒彌擅寶  
寵謀動於簪紱令範光於廊廟攝官憲府勵俗而挺嘉  
猷受委王京匪躬而輸懿績効宣朝任誠著周行申其  
寬直之規三攝損益之任是用命爾為兼司元太常伯  
勲官如故往欽哉爾其供奉彝倫式昭王度勉爾忠正  
之誠無忝恪恭之表納吉之寄可不慎與

龍朔二年十  
月十一日

冊許圜師左相文

皇帝若曰於戲王宮用人弼化佇於丹青宅揆代工成



物資於薪樵軼紀龍而遐翫

關

奉王

劍於副車儼金璫於重席使繁斯在聞望攸歸咨爾左  
常侍檢校左廂兼行太子右中護柱國平息縣開國公  
許圜師箕峰構極橫渚派源幹業峻其家風象賢益其  
門慶神機獨照靈府洞開識宗云篋敏該違珮列榦雲  
敷升漢臺而協彩禪亮波偃懸魏帳而均輝習武經文  
綢繆於丹宸履忠蹈義周旋於玄墀石室蘭坊影筆纓  
而振迹邇聞綸閣飛若綬而盱衡揚歷郡能執釣伊寄

是用命爾為左相勲封如故往欽哉爾其變諧帝載克  
固之躅恢融王道式茂如仁之規削荼止獎可椒茹茅  
其於上賞纂先烈而騰懿裕後昆而垂則祗膺朝獎可

不慎與

龍朔二年  
十月七日

冊薛孤吳仁右金吾大將軍文 上官儀

皇帝若曰於戲望重韜鈴藉董戎之戒志齊金石膺禦  
武之求用深聞輦之慮式著銜珠之象惟爾右金吾將  
軍朔方郡開國公薛孤吳仁志局開爽貞規久濟日契

絳官之術宜符玉帳之機賈勇三軍著折闕之實効誠輸  
八陣標斬將之竒功樹績方隅書勲王府出茂於分閫  
入隆於文戰騰此師訓既穆朝經錫以徽章聿酌僉議  
是用命爾為右金吾衛大將軍封如故往欽哉其勵乃  
忠貞恭茲獎飾祇承寵命可不慎與

冊許敬宗太子太師文

皇帝若曰於戲鳳紀龍名茂績光於銘槃礪金鈎玉嘉  
庸絢於緹油蓋以協贊帝圖弼成鼎命矧乃望高咸一

超庶尹而馳風道鬱半千冠羣后而宣譽咨爾光祿大  
夫行右相許敬宗藉敬生德基賢誕秀謀猷經制識度  
英遠培風逸幹業峻於巨臣滅景宏才器隆於王佐詞  
源清泌濯色於彫翬藝苑冲深抽華於繡牒揮汗淚於  
丹液矯豐餌於雞栖翊弘詞於青闈影長纓於鶴籥訪  
温樹之緘對譽宵燭而題明盛列輝於西豪茂表功於  
東第寵翠泉軒聖掩丹雲固知其可以作訓元儲聳搖  
山之田構喻水善二激伊水之長瀾是用命爾為太子

三十一  
九十二  
太師監修國史等並如故同東西臺三品仍知西臺事  
往欽哉爾其眈而乘謙思克己而蹈禮恒晨謁金墀事  
切於忠蹇夜隨銀啓義先於調護靖恭朝列可不慎乎

冊張延師左衛大將軍文

皇帝若曰於戲姬歷初冲是資方郡之列漢圖攸永往  
隆南北之軍故鏤鼎垂勲銘常紀効坐樹之名為重聞  
輦之慮實深惟爾左衛大將軍檢校羽林軍上柱國張  
延師志局淹凝識度閑雅當風雲之會遇經綸之日執

羈霸府盡忠肅之勤誠聳劍元戎罄旌旄之茂績有六  
奇之秘術蘊三畧之宏規邁遐烈於孫吳掩芳聲於羊  
杜酬報之迹紀運頻周光華之典賢才攸屬是用命爾  
為鎮軍大將軍行左衛大將軍餘如故往欽哉其敬揚  
爾績勉膺朝獎勉爾幹慎之規宣明奇正之法連綴往  
彥可不慎與

唐大詔令集卷六十二

欽定四庫全書

史部

唐大詔令集卷六十三  
九至

詳校官編修臣范來宗

編修臣裴謙勛

總校官編修臣倉聖休

校對官助教臣罷萬選

謄錄監生臣劉家珙



欽定四庫全書

唐大詔令集卷六十三

宋 宋敏求 編

大臣

冊贈

冊贈豆盧欽望司空并州大都督文

冊贈楊再思并州大都督文

冊贈高崇文司徒文

冊贈吳少誠司徒文

冊贈劉總太尉文

冊贈李班司空文

冊贈李茂莊太師文

冊贈韓遵太尉文

冊贈劉宗望司空文

陪陵

賜功臣陪陵地詔

功臣陪陵詔

贈郭子儀太師陪葬建陵制

配享

桓彥範等配享中宗廟庭詔

蘇瓌劉幽求配享睿宗廟庭詔

裴冕李晟段秀實配享肅宗德宗廟庭詔

渾瑊配享德宗廟庭詔

實封

加王琚食實封制

加張暉食實封制

加劉幽求食實封制

加郭虔瓘食實封制

賜李光弼實封一子官制

不許李光弼辭封詔

加田承嗣實封制

賜張自勉實封制

加田神功實封制

加馬麟實封制

分郭子儀實封賜諸子詔

馬燧李臯賜實封制

冊贈

冊贈盧欽望司空并州大都督文

維景龍四年歲次庚戌二月

闕

朔二十二日應天神

龍皇帝若曰咨爾故開府儀同三司知軍國重事上柱

國為國公致仕豆盧欽望朕聞古之哲王必有賢佐其  
存也俾又謂之奮庸其歿也不朽謂之立德可不然與  
爾十紀羽儀三朝冠冕專直為搯非法不言溫謙在容  
非禮勿履故能揆路斯穆台階以平而韋賢罷歸疏廣  
辭退致虛守靜方密道樞居常待終竟歸冥錄是用輟  
朝增歡撫事愴懷榮以建旗正其服袞今贈司空并州  
大都督持節備禮冊命則二儀式奉九原可作異爾魂  
魄嘉夫寵數嗚呼哀哉

冊贈楊再思并州大都督文

維景龍三年歲次己酉九月甲寅朔二十三日丙子應  
天神龍皇帝若曰昔孔子云歿魯哀由其作誄晏嬰既  
往齊景為之行哭且謂陪臣義猶存此甫懷良相情則  
過之咨爾故尚書右僕射同中書門下三品監修國史  
上柱國鄭國公楊再思河岳粹靈廟堂神器率由百行  
能具九德自弼諧庶績師長羣寮清白所以樹風丹青  
所以成化有若巫咸之保又傳說之欽承故能宣慈惠

和邁迹垂憲而運同過隙悲深撫几興言軫悼載想謨  
猷發金滕之舊銘詢葬亳之前訓俾加印綬秩齊於子  
真式奉園陵志畢於元凱是用增寵命於端揆茂徽章於  
連帥今贈爾并州大都督遣太府少卿韋璿持節備禮  
冊命方使五公門闕二臣丘壠魂而有靈懿茲榮贈嗚  
呼哀哉

贈高崇文司徒文

維元和四年歲次己丑十月癸丑朔十三日乙丑皇帝



若曰自我有國大諸侯之勲勞者必勒功圖形播於鐘鼎藏於故府歿則極異等之禮以嘉魂魄使奮乎百代之上百代之下為臣者莫不興起也咨爾故邠寧慶等州節度度支營田觀察處置等使充京畿諸軍都統開府儀同三司檢校司空同中書門下平章事持節邠州諸軍事兼邠州刺史上柱國南平郡王食邑三千戶高宗文英姿絕羣雄略神授上通星辰之氣克扶期運之數少事塞門保寧朔漠千秋之勇常冠軍鋒吳芮之忠

早書竹素頃以并給之下盜臣流毒獸心狼顧誘脅我  
人遂拜於齋壇授以蕭斧束馬蓐食先命戒途曾無再  
籍之役不用一卒之死生致首惡戮屍天街西南晏清  
安堵如故禮加九命秩尊三事貴列東第壤踰徹侯動  
盪夷夏輝灼編簡進律還師兼制舊疆靡卧鼓翳解甲  
休卒期以無征迨乎三紀暗忽生災壽量中輟維屏之  
嘆怛然疚懷故命國子祭酒劉宗經副使司勳郎中李  
直方持節冊贈爾為司徒賻祔命數率禮加等式表無

盡之功用申不檢之賞將我痛悼告於幽神

冊贈吳少誠司徒文

維元和四年歲次己丑十二月壬申朔二十七日戊戌  
皇帝若曰歿加榮號所以勸人示其爵列之差用彰禮  
命之數咨爾故彰義軍節度度支營田申光蔡等州觀  
察處置等使光祿大夫檢校司空同中書門下平章事  
使持節蔡州諸軍事兼蔡州刺史上柱國濮陽郡王吳  
少誠嘗賈拳勇習知戰陣服上將之號令為中書之首

出及鑿門建牙授以封域稜威以行法制峻文以輯賦  
與當先聖之委遇極寵祿之休顯序位列公台之盛茅  
土有侯王之尊謂終身遐紀策勳功令壽量斯盡軫於  
予衷今遣使權知宗正卿李詞副使起居舍人裴度持  
節冊贈爾為司徒於戲守屏之臣注意斯重昭我寵渥  
藏於後昆

冊贈劉總太尉文

維長慶元年四月某日皇帝若曰朕聞古有履忠仗順

生而大有為者又有功成身退歿而永不朽者非正氣  
令德間生挺出則高名大節孰兼之哉天平軍節度使  
檢校司徒兼侍中楚國公劉總降自天和立為人傑得  
君於先帝協運於昌時纂戎弓裘守土燕薊迨此一紀  
北方晏然有開必先納款於我沉斷大事奮揚竒謀奉  
幽都四封之圖挈盧龍三軍之籍盡獻闕下高謝人間  
感動君臣驚激忠義顧妻子若脫屣等富貴如浮雲惟  
道是從奉身以退仲連事成而蹈滄海子房名遂而追

赤松賢明所歸古今一致朕方改授兵柄移鎮鄆郊命  
作司徒倚為左相期奮乃志將沃朕心而天不憖遺邦  
失柱石夫臣戴君如元首則君視臣如股肱股肱虧何痛  
如是茲朕所以輟朝軫念備禮殊恩庸建爾於上公蓋  
褒贈之崇重者也嗚呼爾總尚知之乎今遣使某官某  
持節冊贈爾為太尉

冊贈李珣司空文

杜牧

維大中六年歲次壬申五月丁卯朔十六日壬午皇帝

若曰國有元老道可咨稟天命不助倏然去我宜加褒  
命以慰重泉咨爾故淮南節度副大使知節度事管內  
營田觀察處置等使金紫光祿大夫檢校尚書右僕射  
兼揚州大都督府長史御史大夫上柱國贊皇縣開國  
公食邑一千五百戶李珣立德行道繼長增高貴而彌  
篤在文宗朝徧歷清近內備顧問嘗推姦亮外領事權  
善提典故爰付魁柄實肖象求鎮撫四夷莫不誠信訓  
導百吏皆有程品左官荒服衆疑非罪事君以道知我

其天李固之確論無私周公之金縢終啓自朕統御尊  
敬舊老分委戎輅作鎮孟津訓兵令行活人化洽飽聞  
聲價渴見風采以大冢宰徵歸朝廷謹直忠貞骨鯁魁  
礪凡所陳啟無非理法遂乃裂授東夏表率諸侯能救  
飢艱克為康泰初陳微恙請捐重寄駟騎奔問侍醫臨  
理旋聞大病却食流涕命也奈何痛悼不及今遣使某  
官某副使某官某持節冊贈爾為司空魂而有知鑑茲  
誠意嗚呼哀哉



冊贈李茂莊太師文

錢翊

維年月日某甲子皇帝若曰忠信之於人也若酒醴之有麴蘖也智者厚而愚者薄能者寡而知者衆麴蘖厚而遺味深忠信厚而遺美大存誠所至享福必全生死既分是非乃定咨爾故山南節度使開府儀同三司檢校太傅典侍中興元尹李茂莊懷忠信之實以圖其身行之不迷用則不匱得之善始守之克終故金蟬左貂為爾之冕昭其官也彤弓旅矢為爾之器昭其錫也而又

卷之三  
帶綬係印曰公曰相位列元帥政在中權馮翊分三輔  
之豪成紀接右界之險俾爾出號令爾惟有威俾爾施  
教條爾惟有惠威則鮮犯惠則鮮違吾復以漢中控諸  
蜀塞耀爾昆弟聯彼封疆易武節以授之擇善地以固  
之勸夫忠信是亦庶幾爾尚其當職必修許盟必會更  
資共獎且勵率循無使我擇臣心得以示信萬國之川  
流靡息一朝之山立遽頽嗟復魂以安歸悼降年之非  
永戎昭所賴天奪良多言念舊臣亦不半在茲以悽惻

何必鼓鞀昔人能立武者則太公為師慰爾之行用示  
追顯是為有卒無為不暝今遣某官某等持節冊贈爾  
為太師嗚呼爾其聞吾茲命

冊贈韓遵太尉文

維年月日某甲子皇帝若曰爵以充其量祿以報其功  
君命之始也贈以昭其數誥以申其悲君命之終也視  
朝乃廢厥悼可知咨爾故靈武節度使韓遵緒承三傑  
勇抗萬夫用材既適於輪轅赴節有同於金鼓寡言而

信匪怒而剛握善陣之沉機裕捷伐之秘策使之奉祀亦克象賢提封以寧在政無改絕編戶之子役撫諸戎之允懷牧馬雖多罔侵吾土射鵬自遠空墮塞垣攬留黎而安敢渝盟候甌脫而何嘗得氣惟茲宣力是謂良哉而中權未襄內寇難遏朔風方勁朝露已晞孰為不永之年貽我或虧之痛嗚呼富則侯矣貴高相矣揣時立則節遂終身有涯之生息焉奚恨舉秦官之顯秩表漢將之殊庸以極朕心庶弘君道今遣某官某等持節冊

爾為太尉雖冠劍之禮且飾丘封俾篆刻之文永光冥漠游  
魂在地期爾尚知

冊贈劉宗望司空文

維年月日某甲子皇帝若曰生不能用死而誅之為上  
者且愧於心古君子亦云非禮其或嘗居夾輔兼授中  
權生也無不用之悲歿也有可追之命展茲異數示彼  
諸孤我念大臣庶幾得禮咨爾故特進兵部尚書劉宗  
望氣聚之稟直枉自分先哲王於是而觀賢不肖於焉

乃定所以樹為吉德彰在令終論若所為信如斯語始  
於家事勵以躬行處昆弟之歡耻聞優劣視僕隸之役  
常務寬容避名無取乎白眉掩過每夏爛手周愛疏屬  
惠徧故人位高而惟恐驕矜權至而未嘗擊斷剛亦不  
茹怨乃用希是以誠存則安族大能保天非有私於若  
惟若有順於天昔者太史秉書冲人嗣訓時乃之任首  
冠侍臣罔漏代言以光誕告機平旬歲免應旁求佐理  
甚勤念功如在比從蜀道入補夏卿方持嘉謨共熙庶

績一旦奪我心脅病爾膏肓夢兩楹而遽罹明徵偃巨  
室而猶疑假寐永言辨色遂絕履聲且臨將葬之期彌  
積或虧之痛自朝受策以洎登車往慰逝川俾光坏土  
今遣使左諫議大夫憲王博副使倉部郎中溫緒持節  
冊爾為司空嗚呼吾所申命何若於魯侯之誅屬辭於  
若尚知之哉

陪陵

賜功臣陪陵地詔

欽定四庫全書

唐文苑英華

卷六十三

十三

乾坤合德爰著易簡之功君臣同體克成中和之治遠  
取之物若舟楫之濟巨川近取諸身若股肱之戴元首  
同心協契存歿以之故諸侯列葬周文創陳其禮大臣  
陪陵魏武重申其制去病佐漢還奉茂陵之塋夷吾相  
齊終托牛山之墓斯蓋往聖垂範前賢遺則錄曩昔之  
宿心篤始終之大義者也皇運之初時逢交泰掃除多  
難光啟鴻業謀臣武將競進轅門之前明德異材爭趨  
魏闕之下或雷雲伊始功參締構或光華在旦績著弼



諧及密戚懿親舊勲宿德委質先朝特蒙顧遇者自今以後身薨之日所司宜賜以基地并給東園秘器事從優厚庶敦追遠之典以申罔極之懷

貞觀十一年十月

### 功臣陪陵詔

周室姬公陪於畢陌漢庭蕭相附彼高陵寵錫墳塋聞諸上代從窆陵邑信有舊章蓋以懿戚宗臣類同本之枝幹元功上宰猶在身之股肱哀榮之契實隆終始之義斯允今宜聿遵故實取譬拱辰庶在鳥耘之地無虧

魚水之道宜令所司於昭陵南左右相封境取地仍即  
標誌疆域擬為葬所以賜功臣其父祖陪陵子孫欲來

從葬者亦宜聽許

貞觀二十  
年八月

### 贈郭子儀太師陪葬建陵制

天地以四時成物元首以股肱作輔公台之任鼎足相  
承上以調三光下以象五嶽允釐庶績鎮撫四夷體元  
和之氣根貞一之德功至大而不伐身處高而更安尚  
父比呂望之名維師贈周公之位盛業可久沒而彌光

故太尉兼中書令上柱國汾陽郡王尚父子儀天降人  
傑生知王佐訓師如子料敵如神昔天寶多難逆羯作  
禍咸秦失險河洛為戎公能翼扶肅宗再造區夏國有  
患勞其勛定邊有寇藉其驅除安社稷必在於絳侯定  
羗戎無踰於充國絳臺綏四散之衆涇陽降十萬之虜  
勲高古今名警夷狄而勞乎征鎮二紀於茲頃以春秋  
既高疆場無事罷彼旌鉞寵在台衡以公柱石四朝藩  
翰萬里忠貞懸於日月寵遇冠於人臣尊其元老加以

崇號期壽考之永養勲賢之德膏肓生疾藥石靡攻人之云亡梁木斯壞雖賻禮加等輟朝增日悼心流涕曷可弭忘更議追崇名位斯極尊為尚父官協太師雖爵秩則同而體望尤重歛以衮冕旌我元臣聖祖園陵所宜陪葬式墓重文侯之禮象山追去病之勲千載如存九原可作冊命之禮有司備焉可贈太師陪葬建陵仍令所司備禮冊命賻絹三千疋布千端米麥三千石

配享

桓彥範等配享中宗廟庭詔

皇輿肇建必有輔佐之人天步艱難爰仗經綸之業故  
侍中譙國公桓彥範故中書令兼吏部尚書漢陽郡公  
張柬之特進博陵文貞公崔玄暉故中書令南陽郡公  
袁恕己等並德惟神降材與運生道協台岳名書識緯  
寅亮帝載勤勞王家參復禹之嘉謨奉昇唐之景命雖  
徂謝既久而勲烈益彰撫彝鼎以念功想旂常而增感  
緬遵故實用表徽懿俾列在清廟登於明堂克申從祀

卷六十三  
之儀式茂酬庸之典並可配享中宗孝和皇帝廟庭

蘇瓌劉幽求配享睿宗廟庭詔

凡有功者銘書於王之太常祭於大蒸司勳詔之允所謂酬庸紀勞頒賞旌善藏於天府饗於廟庭臣哉鄰哉其道光也故尚書左僕射太子少傅贈司空荊州大都督府長史許文貞公瓌開邪存誠久迪厥德故尚書右丞相太子少保彬州刺史徐國公幽求聞義盡節克茂乃勲並儀型羣工左右厥辟直道罔缺危言愈彰景雲

末年邦國多難愷悌君子服勞王家或親受顧托以安  
劉氏或潛圖翼贊願奉唐侯纘乃舊服協於先契交濟  
弼亮厥功茂焉俾台小子嗣守文武之業獲奉宗廟之  
靈寶璽元輔是歆命茲予大享于先王爾其從祀以配我  
有唐之休烈並可配享睿宗大聖真皇帝廟庭

裴冕李晟段秀實配享肅宗德宗廟庭詔

朕聞昔之佐制物者咸有大功是惟五官以配五帝自  
時厥後有國家者莫不以輔弼之寄社稷之勲登名大





備於前朝光陰不追盛烈如在朕頃因郊祀爰舉典常  
俾著茂勲以配殷祭惟咸有一德允屬乎三臣庶昭示  
於將來式崇恩於既往冕宜配享肅宗廟庭晟秀實宜  
配享德宗廟庭

渾瑊配享德宗廟庭詔

旌勸相先久協念功之義薦羞爰舉聿追配享之儀贈  
太師瑊鍾秀誕靈逢時翼聖銘鏤金石帶礪山河績既  
著於先朝業宜光於後代俾之從祀用表遺勲宜配享

德宗廟庭

實封

加王琚等食實封制

蘇頌

門下古之書甲令銘太常若不撫翼青雲馳光白日未  
有君則議賞速為善而知勸臣亦避榮保流謙而益受  
莫非君臣之際感通之理然也新除銀青光祿大夫守  
戶部尚書崇文館學士趙國公王琚體融純粹鑒激精  
微謨猷濟時詞學辨政新除銀青光祿大夫守工部尚

書楚國公姜皎宏才個儻勝氣清明含章揆發臨事條  
解新除銀青光祿大夫殿中監宋國公李令問居惟密  
靜胄實勲華率禮而和立言以信或受釐則問或捨講  
相得非直蕭曹不遠自我之舊故能管樂咸起致我在  
斯頃掃羣兇翳賴其力爰升茂寵同辭厥位誠非易奪  
義所難違俾增秩於掖垣更回班於殿省仍加井邑以  
答元勲琚可行中書侍郎俸祿防閣品子課等一事以  
上同三品給加食實封二百戶通前滿五百戶皎可殿

中監仍充內外閑廐使加實封二百戶通前滿七百戶  
令問可行殿中少監兼知尚食加實封二百戶通前滿  
五百戶散官封學士各如故主者施行

天寶二年七月十八日

### 加張暉食實封制

門下疏爵列土是稱王制大功盛德必建侯封銀青光  
祿大夫大理卿張暉守道恭懿飭躬哲誠寅亮邦國實  
繁於華爰同君親忠出於孝比者潛申翊戴屢挫兇慝  
故以議存謀始防在慮先披荆之效不渝採葛之讒遂

起粵自荒裔升於王朝追朱佑之前言深啟於天命指  
蕭何之舊事獨高於人傑思弘賞典用載盟書惟鄧樂  
郡陪京輿壤宜賜於茅社永旌采地可封鄧國公賜實  
封三百戶餘如故主者施行

先天二年七月十九日

### 加劉幽求食實封制

門下忠而獲戾時所歎息賞以念勤邦之彝典金紫光  
祿大夫守尚書左僕射知軍國重事監修國史上柱國  
徐國公劉幽求長才偉度博聞強學周百慮以匡社稷

竭一心而在廊廟故能見大義臨大節智可以不俟終  
日誠可以格於皇天曩者恭參誅呂疑深從代弘宣王  
化保乂朕躬政方議於調鉉謗遂興於眩篋良相非罪  
空弔長沙故人有言寧忘曲突自剪元惡旋居左揆利  
更稱於狐偃勳莫逮於蕭何兼而有之義固應爾宜加  
土宇永傳帶礪可加賜食實封二百戶餘如故主者施

行先

天二年八  
月十五日

加郭虔瓘食實封制

蘇頌

黃門聞鼓輦之聲者則思於將帥裂茅土之賜者則念  
彼勲庸右羽林軍大將軍兼安西大都護四鎮經畧大  
使上柱國太原郡開國公郭虔瓘忠壯超倫智謀絕等  
決勝千里懷孺子之兵符道通四夷有老臣之戎律往  
者鎮于荒裔獨守孤城煮弩而其人益堅引弓而彼衆  
不敵故得愛于染鍔名王息戈穹廬掃地而沙漠因以  
歸附功則茂矣朕實休之宜誓河山開其井邑可進封  
潞國公食邑三千戶仍賜實封二百戶餘並如故主者

施行

開元三年十一月十八日

賜李光弼實封一子官制

功崇望重加以服章德厚流光延其茂賞爰益苴茅之  
典並明幹蠱之才副元帥太尉兼侍中都督河南淮南  
淮西山南東諸道節度行營事上柱國臨淮郡王光弼元  
勲濟代公輔推賢宣大化之神明總專征之師律自征  
移鎮負海距河連帥百城旌旗千里東郊誓衆雅繼魯  
侯之功北伐擁旄首稱漢將之畧高牙罷設重鼎新調



尤知武庫之深實在雲臺之右疇其真食美以保家僉  
議允諧舊章斯舉敬哉有土更載丹書之盟鯉也趨庭  
宜升紫綬之寵可加實封二百戶仍與一子官階三品  
餘並如故

不許李光弼辭封詔

爵土之封以彰勲德故授者適當其分使賞在必行而  
得之者不讓其餘使人有可繼國之彝憲在乎至公往  
者寇逆亂常京師失守太尉兼侍中河南副都元帥知

河南淮西山南東道諸節度行營事上柱國臨淮郡王  
光弼首奉師律光佐先朝克殄氛祲底寧宗社自朕繼  
承丕績又置大功扶顛履危勤恤于外可謂忠存王室  
道濟生人則食邑所加繫惟常典爾因疾故遽有懇辭不  
伐茂勲請歸實封覽其章奏用增咽然且福壽之理期  
於勿藥并賦之錫傳于無窮豈爾暫以微瘵便思謙退  
將使其下者何顏受封用阻深誠盖存大體然撫謙有  
素忠義可嘉足以激礪名節光遠退讓宜示中外咸使

知聞

加田承嗣實封制

常袞

勅懋榮勲之賞則啟封邑賜真食之命方入田租故采  
地以處其子孫書社以尊其侯伯開府儀同三司檢校  
尚書左僕射兼魏州大都督府長史御史大夫兼魏博  
等州節度觀察處置及管內度支營田等使上柱國鴈  
門郡王食實封二百戶田承嗣出自河朔挺茲才器公  
忠有素文武是經行惟高簡言必誠信委之腹心實所

親重內列端揆外當藩幹拒河作鎮瀕海撫封貞一以  
奉上明恕以臨下謀出鞞鈴之外功成戰伐之前專精  
牧人盡瘁事國政刑必中都鄙有章訓以農耕之業課其  
蠶織之事家給而禮讓攸興氣和而札瘥不作舊章咸  
舉厥貢惟殷來東人之職勞首循吏之行理嘉命休績  
允茲褒勸食其并賦用協典常可加實封二百戶餘並  
如故

賜張自勉實封詔

頃者逆豎靈耀阻兵大梁淮西都虞候賜太常卿贈揚  
州大都督張自勉往觀壘焉奉議正詞無所屈撓賊臣  
肆忿斃於鈇鎖朕用憫焉雖錫命之恩已旌寗宥而賞  
延之典宜及子孫可追賜實封五十戶

大歷十二年七月

加田神功實封制

常袞

勅土宇旼章以叙其德田租帖食以答元勳故寇鄧兼  
四縣之封張陳加萬戶之數開府儀同三司檢校尚書  
左僕射使持節汴州諸軍事兼汴州刺史御史大夫充

汴宋等州節度觀察處置等使上柱國信都郡王食實  
封五百戶田神功間生河朔性與忠厚嘗秉大節服勞  
王家凡所委遇必當要重竭其公私益用親信入居百  
揆之右出作四方之屏自河而南戎鎮斯大總兵車之  
所曾賜斧鉞以專征考禮正刑豐財禁暴敬事節用老  
安少懷懋乃丕績肆于時夏服我休命敬茲分土可加  
實封一百戶餘並如故

加馬璘實封制

勅大將在外勤勞有功或未進秩必當加賦更書侯社  
益茂朝章四鎮北庭行軍兼涇原等州節度使開府儀  
同三司檢校工部尚書兼御史大夫上柱國扶風郡王  
馬璘以牧人御衆之才膺方叔召父之任理事誥禁以  
屏西郊撫和其人爰得衆力智謀濬發忠義侃然武能  
用典師在制命紀述伐畔服柔示懷懲密人之不共執  
戎子以數罪務於德禮以濟威刑關右寧謐賴其鎮定  
社稷之衛予嘉乃勲厚其田租式寵戎闡可加實封二

百戶餘如故

分郭子儀實封賜諸子詔

故尚父太尉兼中書令汾陽郡王食實封二千戶贈太師子儀功格上玄道光下土積其善慶垂裕無窮雖嫡長云殂而支宗斯盛汾陽舊邑蓋有不承其男前左散騎常侍駙馬都尉食實封五十戶暖夙稟義方居忠履孝儷崇銀榜攄美金章繼撫先封允宜聽復暖兄檢校工部尚書兼太子賓客趙國公晞並弟右金吾將軍昶



國公食實封一百五十戶曙太子左諭德映並有令名  
保其先業宜允推恩之典以明延嗣之誠其實封二千  
戶宜准式減半餘以分襲峻可襲代國公仍通前襲三  
百戶晞可襲二百五十戶曙可襲二百五十戶通前三  
百七十五戶映可襲二百五十戶

貞元

馬燧李臯賜實封制

勅列位以旌德胙土以報功國有彝章是存褒勸朕以  
不德間逢多虞蒲坂有叛亂之臣淮沂有僭逆之帥萬

姓罹害四方靡寧河東保義奉誠軍節度兵馬副元帥  
檢校司徒兼侍中馬燧大厯初忠誠奮激躬率士卒討  
茲不庭畧地如歸功成必克晉絳慈隰靡然向風元亮  
勢窮竟就殲滅清我甸服時惟茂勳荆南節度觀察處  
置使檢校戶部尚書嗣曹王臯親率全軍抗於強虜晝  
夜不息迨於三年謀成必滅師出皆捷復蘄黃之地拔  
安陸之城隱其威名保入江漢並節著於國功存于人  
効跡炳然僉議攸屬雖懋官已至而食賦未加疇庸之

科無乃有間宜有寵錫以答殊勲燧可賜實封五百戶  
臯可賜實封三百戶

唐大詔令集卷六十三